

Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaannut Namminersorlutik Oqartussat nalunaarutaat

Matumuuna nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaat nr. 31, 23. november 2017-imeersoq, Inatsisartut inatsisaata nr. 58-ip, 25. november 2024-mi atuutilersup kingunerisaanik allannguuteqartinneqartoq nalunaarutigineqarpoq.

Kapitali 1

Kisermaassinermit aalajangersakkat

§ 1. Namminersorlutik Oqartussat Kalaallit Nunaanni, Kalaallit Nunaannut aamma Kalaallit Nunaanniit nalunaarasuartaatitigut atassuteqarnermik neqerooruteqartartutut, kiisalu Kalaallit Nunaanni nalunaarasuartaatitigut attaveqarnermut atortunik, pilersuisut atuisullu akornanni attaveqaatit naapiffiisa (nettermineringspunkt) akornanni imaluunniit illoqarfiit nunaqarfillu akornanni aammalu nunanut allanut atortut elektroniskiusut atorlugit attaveqaatigiinnissamik ajornarunnaarsitsisut sanaartornerini ingerlanneqarnerinilu kisermaassisuupput.

Imm. 2. Imm. 1 naapertorlugu kisermaassinermit pineqanngillat:

- 1) radiukkut atassuteqarneq aamma radiukkut aallakaatitsinermit frekvensinik atugassanngortitsineq, aamma
- 2) ajunaalernerni isumannaallisaanikkullu sullissinerit.

Imm. 3. Namminersorlutik Oqartussat kisermaassineranni ilaatinneqanngillat atortut soorlu:

- 1) naalagaaffimmi oqartussat kommunilluunniit taamaallaat namminneq oqartussaaffimminni nalunaarasuartaatitigut attaveqarnissamut pisariaqartitsinerannut immikkut ittunut atugassat nalunaarasuartaatitigut aqquersuutini tamanut ammasuni nalinginnaasuni periarfissiinngitsut, imaluunniit
- 2) illuutigisap iluani imaluunniit illuutigisat arlariit ataatsimik piginnittoqartut akornanni taamaallaat atorineqartut, atortut illoqarfirmi nunaqarfirmiluunniit ataatsimiippata, imaluunniit.

§ 2. Kisermaassinermit § 1, imm. 1-imi taaneqartumut ammanerulersitsineq pillugu Naalakkersuisut aalajangiisinnaapput.

Imm. 2. Nalunaarasuartaateqarnermi kiffartuussiviit uku ammanerulersinneqarput:

- 1) Paasissutissat ingerlaarnerinut kiffartuussivik.

2) Internetimik kiffartuussivik.

3) Radiukkut TV-kullu aallakaatitanik siaruarterineq.

Imm. 3. Nalunaarasuartaateqarnermik attaveqaqatigiinnermi atortut uku ammanerulersinneqarput:

1) Silaannakkut aallakaatitsinnermut attaveqaqatigiinnermut atortut.

2) Radiukkut TV-kullu aallakaatitanik satellitikkut tigooraasinnaanermut attaveqaqatigiinnermut atortut.

3) Radiukkut TV-kullu aallakaatitat siaruarternissaannut attaveqaqatigiinnermut atortut.

Imm. 4. Imm. 1-imi nalunaarasuartaatitigut atortut, pilersuisut atuisullu akornanni attaveqaatit naapiffiisa (nettermineringspunkt) akornanni imaluunniit illoqarfiit nunaqarfillu akornanni aammalu nunanut allanut atortut elektroniskiusut atorlugit attaveqaqatigiinnissamik ajornarunnaarsitsisut pineqanngillat.

Imm. 5. Naalakkersuisut nalunaarasuartaatitigut attaveqarnermut imm. 4-mi taaneqartut ammanerulersinneqarnissaannik aalajangiisinnaapput, tassani teknologi pineqartoq silaannakkut aallakaatitsissutit atorlugit nuussisarneq aallaavigineqarpat, aammalu taamaallaat illoqarfiit imaluunniit nunaqarfiit ataasiakkaat iluanni atorneqartussatut naatsorsuussaappata. Ammanerulersitsinissaq aalajangiunneqarpat Nalunaarasuartaateqarnermi Aqutsisut (Telestyrelsen) pisuni immikkut ittuni teknologimi pineqartut atortut kabelillit atorlugit atuinissamut immikkut ittumik akuersissuteqarsinnaapput.

Imm. 6. Naalakkersuisut nalunaarasuartaatitigut kiffartuussinerit aamma nalunaarasuartaatitigut attaveqaatit ammanerulersinneqartut pillugit maleruagassanik aalajangersaassapput.

§ 3. Naalakkersuisut apparatinik atortunillu, nalunaarasuartaatitigut attaveqaatinut atatillugu attavilerneqartunik imaluunniit atorneqartunik, kiisalu sanaartukkanik immikkut ittumik siunertaqarfiusumik atorneqartunik ammanerulersitsisoqassanersoq pillugu aalajangiisinnaapput.

Imm. 2. Naalakkersuisut apparatit atortullu tamanut ammasumik nalunaarasuartaatitigut attaveqarnermi aqqutitut atassuserneqartut taakkunungalunniit atatillugu atorneqartut pillugit malittarisassanik piumasagaatinillu aalajangersaasinnaapput:

1) Aaqqissuussaani, suliarineqarneri, inissinneqarneri, ingerlanneqarneri atorneqarnerilu pillugit.

2) Atortunik apparatinillu akuersissuteqartarneq pillugu.

3) Atortulersuutit ikkussukkallu nakkutiginerat takusartarnerallu pillugu.

Kapitali 2

Isumasiuutit

§ 4. Inatsisartut inatsisaanni matumani nalunaarasuartaatitigut kiffartuussinnermi pineqartut tassaapput kiffartuussinerit, nipitut, assitut, allakkatut taakkuluunniit akuleriissillugit radiukkut nalunaarasuartaatitigulluunniit attaveqaqatigiinnermi atortut atorlugit pilersuisut atuisullu akornanni attaveqaatit naapiffiisa (nettermineringspunkt) akornanni tamakkiisumik ilaannaasumilluunniit elektroniskiusumik nuunneqartartut, taakkununga ilaallutik siumut utimullu attaveqaqatigiinnerit imaluunniit siumuinnaq attaveqarnerit, aallaavimmiit aallaavimmut attaveqaqatigiinnerit aammalu aallaavimmiit aallaavimmut tamanut atuuttumut attaveqaqatigiinnerit.

Imm. 2. Inatsisartut inatsisaanni matumani pilersuisut atuisullu akornanni attaveqaatit naapiffiat (nettermineringspunkt) pineqartoq tassaavoq nalunaarasuartaatitigut attaveqaatit ilusilersugaaneranni

atortulersuutit imaluunniit atortut naaffi, atuisuusup attassusiivigisai. Naalakkersuisut atortut naaffi taaneqartut qanoq paasineqarnissaat pillugu maleruagassiorsinnaapput.

Imm. 3. Inatsisartut inatsisaanni matumani atuisuusutut taaneqartut tassaapput nalunaarasuartaatitigut kiffartuussinernik atuisut, niuerneramik tunngaveqarani nalunaarasuartaatitigut kiffartuussinernik pineqartunik allanut atugassiisuusut.

Kapitali 3

Akuersisummi aalajangersakkat

Akuersisummik nalunaaruteqarneq

§ 5. Naalakkersuisut sanaartukkanut, nalunaarasuartaatitigut attaveqaqatigiinnermut atortut ingerlanneqarnerinut aamma nalunaarasuartaatitigut, taakkunungalu qaammataasatigut ilanngullugit, kiffartuussinernik neqerooruteqarnermut akuersissutinik nalunaaruteqarsinnaapput.

Imm. 2. Akuersisummik pigisaqartup akuersissuteqarfiusumi ammanerulersitsinikkut imaluunniit suliassa qarfinnut imm. 1-imi taaneqartunut immikkut pisinnaatitaaffeqartitsinerup atuutsinneqalerneratigut annikillissutissat sapissanngilai.

Imm. 3. Naalakkersuisut akuersisummut tunngatillugu maleruagassiorsinnaapput:

- 1) Sullississutini pineqartuni atorsinnaassusissatut sullissinerullu qaffasissusissaatut piumasaqaatinik.
- 2) Akilersueriaatsinik atuinerullu piumasaqaatinik akuersissuteqarnissamut.
- 3) Akuersisummik pigisaqartup maleruagassiornermi piumasaqaatinillu aalajangersaanermi, kiisalu nakkutilliinermi misissuinermilu suleqataanissamut pisussaaffeqarneranut.
- 4) Akuersisummik pigisaqartup immikkut iluanaaruteqarani imaluunniit toqqaannartumik amigartooruteqarani suliassanik immikkut ittunik suliqaarnissamut pisussaaffeqarneranut.
- 5) Nalunaarasuartaatitigut attaveqaqatigiinnermi inuiaqatigiinnut pingaarutilimmi immikkut pisoqartillugu tamatuma Namminersorlutik Oqartussanut aningaasartuutaanngitsumik ingerlanneqarnissaanik qulakkeerinnissamut ingerlatsinissamullu.
- 6) Akuersisummik pigisaqartup akeqanngitsumik nunat allat nunallu iluani suleqatigiiffinni peqataaneranut.
- 7) Akuersisummik pigisaqartup ingerlaneramik nakkutilliinermut, tassunga ilaallutik taarsigassarsisarnermik periaatsinik, kiisalu nalunaarasuartaatitigut attaveqaqatigiinnermut atortunik ineriartortitsinermik aserfallatsaaliuinissamillu aalajangersaaneq.

§ 5 a. Naalakkersuisut sullissinerni akuersissuteqarfiusuni nunap immikkoortuini akitigut naligiissaarisoqassasoq akuersisummik pigisaqartumut peqqusisinnaapput, tak. § 5.

Nalunaarasuartaatitigut attaveqaatinik, kabelinik ledninginillu il.il. inissiineq.

§ 6. Akuersisummik pigisaqartoq nunaminertanik atuinermut pilersaarusiornermullu Inatsisartut inatsisaanni maleruagassat naapertorlugit nalunaarasuartaatitigut attaveqaatinik ikkussuisinnaavoq, tassanissaarlu aamma nalunaarasuartaatinut kabelit pineqarput.

Imm. 2. Akuersisummik pigisaqartoq nalunaarasuartaateqarnermut atortulersuutiniq illuutini pisortanit namminersortunillu pigineqartuni ikkussuinissamut pisinnaatitaavoq. Suliassat suliarineqarnerini piginnittup atuisulluunniit atortut inissiffissaattut kissaataasa annertunerpaamik malinniarneqarnissaat sapinngisamik anguniarneqassaaq.

Imm 3. Akuersisummik pigisaqartoq nalunaarasuartaateqarnermi attaveqaatit pisinnaasaannik allanngutsaaliuinermit atatillugu tamanna pisariaqartinneqarpat, aammalu atuisumut imaluunniit piginnittumut siumoortumik ilisimatitsereernikkut nalunaarasuartaatitigut atortulersuutiniq nakkutilliinermit suliaqarnermullu atatillugu uppersarsaammik iluameersumik eqqartuussivitsigut aalajangigaanngitsumik takutitsinikkut illuutitut pisortanit namminersortunillu allanit pigineqartunut isernissamik piumasaqarsinnaavoq.

Imm 4. Illuutini pisortanit namminersortunilluunniit allanit pigineqartuni nalunaarasuartaatitigut atortulersuutiniq kabelinillu ikkussuinermit aserfallatsaaliuinermullu, aammalu taakkuninnga nakkutilliinermit atatillugu annaasat taarsiiffigineqarnissamut maleruagassat atuuttut malillugit taarsiiffigineqarsinnaapput.

§ 7. Ikkussuiffinnik kabeleqarfinnilluunniit akuersisummik pigisaqartup pigisaanik ikkussuiffiusimasuni akuersisummik pigisaqartoq akuersiteqqaarnagu illuliortoqarsinnaanngilaq nunaluunniit assallugu sulisoqarsinnaanani imaluunniit allanik iliuuseqartoqarsinnaanani, nalunaarasuartaateqarnermi atortut akornusersorneqarnissaannik ajoquserneqarnissaannilluunniit kinguneqarsinnaasunik.

Taarsiineq

§ 8. Akuersisummik pigisaqartoq atortuni, Namminersorlutik Oqartussat kisermaassisuuffigisaani akornusersuinerup, kinguaattoornerup, maskiinanik unittoornerup imaluunniit ingerlatsinermit kukkusumik suliaqarnerup kingunerisaanik annaasanut taarsiissuteqarnissamut pisussaataitaanngilaq.

Naalakkersuisunut ilisimatitsisarneq

§ 9. Naalakkersuisut akuersisummik pigisaqartup siulersuisuini siulittaasoq taassumalu tullia pissutsinik akuersisummik pigisaqartup suliffeqarfiutaanut tunngasunik ilisimasariaqartunik Naalakkersuisunut ilisimatitsisarnissamik pisussaattissinnaavaat.

Imm. 2. Akuersisummik pigisaqartup siulersuisuini siulittaasup taassumalu tullia Naalakkersuisunut soqutiginaateqartutut isumaqarfigineqarsinnaasut pillugit nammineerlutik Naalakkersuisut ilisimatittassavaat.

Kapitali 4

Nalunaarasuartaateqarnermut

Aqutsisut Nalunaarasuartaateqarnermi Aqutsisut suliassat

§ 10. Nalunaarasuartaateqarnermi Aqutsisut aqutsisoqarfuvoq nammineq ingerlalluni nammineq pisortaartoq.

Imm. 2. Nalunaarasuartaateqarnermi Aqutsisut nalunaarasuartaatitigut atassuteqarnermi ilaatigut suliassaraat:

- 1) Naalakkersuisunut siunnersuisarneq.
- 2) Ineriartormik nakkutilliineq
- 3) Kisitsisitigut paasissutissanik katersineq.
- 4) Inatsisissanik siunnersuusiorneq.
- 5) Nalunaarasuartaatitigut kiffartuussinerni piumasaqaatissanik akinillu siunnersuusiorneq.
- 6) Akuersisummik, pilersuisussaataitanermik sullissisunillu allanik nakkutilliineq.
- 7) Inatsisartut inatsisaata matuma malinneqarnissaanik aamma taanna naapertorlugu maleruagassatut piumasaqaatitullu aalajangersakkat malinneqarnissaannik nakkutilliineq.
- 8) Naalakkersuisut suleqatigalugit nunani tamalaani aaqquussaanut atassuteqarnernik isumagisaqarneq.
- 9) Nalunaarasuartaateqarnermi tunngasunut Danmarkip Kalaallit Nunaatalu akornanni atassuteqarnernik isumagisaqarneq Naalakkersuisut suleqatigalugit.

Imm. 3. Aammattaaq nalunaarasuartaateqarnermi aqutsisut radiukkut atassuteqarneq ingerlatarissavaat.

Imm. 4. Naalakkersuisut suliassat imm. 2-mi 3-milu taaneqartut saniatigut suliassanik allanik Nalunaarasuartaateqarnermi Aqutsisunut suliakkiisinaapput.

Naalakkiisinnaaneq

§ 11. Naalakkersuisut Nalunaarasuartaateqarnermi Aqutsisunut suliassani aalajangersimasuni oqartussaasutut suliassat isumaginissaannut, suliani ataasiakkaani sullissinerup aalajangiinissallu isumaginissaannut imaluunniit peqqussutit matuma taassumalu nassatarisaanik allaffissornikkut peqqussutaasut malitsinnissaat qulakkeerniarlugu Nalunaarasuartaateqarnermi Aqutsisut nakkutilliisussaataitanermik isumagisaqarnissaanut naalakkersinnaanngilaat.

Paasissutissiisussaataaneq

§ 12. Nalunaarasuartaateqarnermi Aqutsisut nakkutilliinissaq, isumaqatigiissitsiniarnissaq, aalajangiinissaq allanilluunniit misissuinissaq siunertarlugu paasissutissanik attuumassuteqartutut naliliiffigineqartunik tamanik nalunaarasuartaatitigut kiffartuussinernik sullissisunut piumasaqarsinnaapput.

Nipangiussisimasussaataaneq

§ 13. Nalunaarasuartaateqarnermi Aqutsisuni sulisut Kalaallit Nunaanni pinerluttulerinermut inatsit naapertorlugu akisussaaffeqarlutik inuunnaat imaluunniit suliffeqarfiit aningaasaqarnikkut inissisimanerannut paasissutissat suliassaminnik isumagisaqarnerminni ilisimalikkatik eqqarsaatigalugit susassaqqanngitsunut pinngitsooratiq nipangiussisussaataitanertik ataqqissavaat.

Imm. 2. Taamatut pisussaaffiliineq aammattaaq ikiortinut sulianik paasisimasalinnut, kiisalu allanut, Nalunaarasuartaateqarnermi Aqutsisut isumaqatigiissuteqarfiginerisigut suliassamik tiguisimasunut pissutsinillu pineqartunik ilisimasaqalersimasunut tamanut atuuppoq.

Imm. 3. Tamanna suliffeqarfimmut isumaqatigiissutaasimappat, taamatut pisussaaffiliineq sulisunut suliffimmi sulinerminni pissutsinik imm. 2-mi taaneqartunik ilisimasaqalersunut tamanut atuuppoq.

Nalunaarusiortussaataitaneq

§ 14. Nalunaarasuartaateqarnermi Aqutsisut pissutsit Nalunaarasuartaateqarnermi Aqutsisut aqutsinerannut tamakkiisumut attuumassuteqartut pillugit Naalakkersuisunut nalunaarusiortussaataitaapput, tassunga ilaallutik suliassat ataasiakkaat annertunerusut, Naalakkersuisunut ilisimassallugit soqutiginaateqartutut isumaqarfigineqarsinnaasut.

§ 15. Nalunaarasuartaateqarnermi Aqutsisut nakkutilliinerminnut atatillugu namminneerlutik misissuisassapput, paasiniaasassapput il.il. Taamatut paasiniaaneq misissuinerlu nalunaarasuartaateqarnermik suliassaqaarfimmit aningaasalersorneqartassaaq.

Imm. 2. Nalunaarasuartaateqarnermi Aqutsisut ukiumoortumik nalunaarasuartaateqarnerup iluani suliassaqaarfinnut imaluunniit isummerfigisassanut, ukiuni tulluuttuni nalunaarasuartaateqarnermi aqutsisut immikkoortortanut annertunerusunik aningaasaliissuteqarnikkut paasiniaanernik misissuinerllu aallartitsinissamik pisariaqartitsiviusut pillugit Naalakkersuisunut siunnersuuteqartassapput.

Imm. 3. Naalakkersuisut paasiniagassanik allanik nalunaarasuartaateqarnermi Nalunaarasuartaateqarnermi Aqutsisunut suliakkiisinnaapput.

§ 16. Nalunaarasuartaateqarnermi Aqutsisut ukiumoortumik nalunaarummik Naalakkersuisunut saqqummiussisassapput:

- 1) Nalunaarasuartaateqarnermi Aqutsisut suliaat pillugit,
- 2) inatsimmut atuuttumut misilittagaat pillugit, kiisalu
- 3) nalunaarasuartaateqarnermi pissutsit pilersuisussaataitanermut atuisunullu illersuinermut attuumassuteqartut.

Kapitali 5

Nalunaarasuartaateqarnermi Maalaaruteqartarfik

§ 17. Naalakkersuisut Nalunaarasuartaateqarnermi Maalaaruteqartarfimmik arlaannulluunniit attuumassuteqanngitsumik pilersitsisinnaapput, nalunaarasuartaatitigut attaveqatigiinnermi maalaarutininik suliaqartartussamik.

Imm. 2. Nalunaarasuartaateqarnermi Maalaaruteqartarfik siulittaasoqassaaq, tassunga sinniisussamik ataatsimik arlalinnilluunniit ilaasortaqaqassalluni, aammalu aningaasaqaarnermik nalunaarasuartaateqarnermilu teknikkimut tunngasunik ilisimasalinnik marlunnik ilaasortaqaqassalluni.

Imm. 3. Nalunaarasuartaateqarnermi Maalaaruteqartarfimmi ilaasortat ukiuni marlunni atuuttussanngorlugit qinerneqartassapput, qinigaaqqissinnaanermut periarfissaqartitsisoqarluni.

Imm. 4. Kalaallit Nunaanni Landsdommeri maalaaruteqartarfimmi siulittaasussamik taassumalu sinniisussaanik, inatsilerineri soraarummeersimasumik toqqaassaaq. Siulittaasoq eqqartuussivimmi fuldmægtigissamik toqqaaniarnermi piumasarineqartutut piginnaaneqassaaq misilittagaqassalluni.

Imm. 5. Naalakkersuisut Kalaallit Nunaanni nalunaarasuartaateqarnermik suliassaqarfimmit innersuussisoqareerneratigut ilaasortassanik marlunnik toqqaassapput.

Imm. 6. Naalakkersuisut Nalunaarasuartaateqarnermi Maalaaruteqartarfiup oqaaseqaataanik piniareernermikkut taassuma suleriaasissaanik aalajangersaassapput.

Imm. 7. Naalakkersuisut allattoqarfittut ikiorsiisussanik Nalunaarasuartaateqarnermi Maalaaruteqartarfimmut atugassiissapput.

§ 18. Nalunaarasuartaateqarnermi Maalaaruteqartarfiup Nalunaarasuartaateqarnermi Aqutsisut akuersissutinik pigisaqartut, kiffartuussinernik tuniniagaqartut allat aamma pilersuisussaataasut pillugit aalajangiinerinut maalaarutit sularisassavai.

Imm. 2. Nalunaarasuartaateqarnermi Maalaaruteqartarfiup pissutsit imm. 1-imi taaneqartut pillugit maalaarutinut aalajangiineri sapinngisamik Nalunaarasuartaateqarnermi Maalaaruteqartarfimmut saqqummiunneqarneranniit kingusinnerpaamik qaammatit pingasut qaangiunnerini piareersimassapput.

Imm. 3. Suliassat sularineqarnerat allakkatigut ingerlanneqassaaq.

§ 19. Naalakkersuisut Nalunaarasuartaateqarnermi Maalaaruteqartarfiup sulineranut maleruagassanik sukumiinerusunik aalajangersaassapput.

Paasissutissiisussaataitaneq

§ 20. Nalunaarasuartaateqarnermi Maalaaruteqartarfiup maalaarutininik suliaqarnerminut atatillugu akuersisummik pigisaqartoq, pilersuisussaataitallutik sullissisut aamma nalunaarasuartaateqarnermi tuniniagaqartut paasissutissanik aalajangiinissamut attuumassuteqartutut nalilerneqartunik piniarfigisinnaavai.

Nipangiussisimasussaataitaneq

§ 21. Nalunaarasuartaateqarnermi Maalaaruteqartarfimmi sulisut Kalaallit Nunaanni pinerluttulerinermut inatsit naapertorlugu akisussaaffeqarlutik inuinnaat imaluunniit suliffeqarfiit aningaasaqarnikkut, inuussutissarsiornikkut imaluunniit inuttut inuunermut inissisimanerannut paasissutissat, suliassaminnik isumagisaqarnerminni ilisimalikkatik eqqarsaatigalugit susassaqqanngitsunut pinngitsooratik nipangiussisussaataitanertik ataqqissavaat.

Imm. 2. Taamatut pisussaaffiliineq aammattaaq ikiortinut sulianik paasisimasalinnut, kiisalu allanut, Nalunaarasuartaateqarnermi Maalaaruteqartarfiup isumaqatigiissuteqarfiginerisigut suliassamik tiguisimasunut pissutsinillu pineqartunik ilisimasaqalersimasunut tamanut atuuppoq.

Imm. 3. Tamanna suliffeqarfimmut isumaqatigiissutaasimappat, taamatut pisussaaffiliineq sulisunut suliffimmi sulinerminni pissutsinik siuliani taaneqartunik ilisimasaqalersunut tamanut atuuppoq, tak. imm. 2.

§ 22. Nalunaarasuartaateqarnermi Maalaaruteqartarfiup aalajangigai allaffissornikkut oqartussaasunut allanut ingerlateqqinneqarsinnaanngillat.

Imm. 2. Nalunaarasuartaateqarnermi Maalaaruteqartarfiup aalajangiineri aalajangiinerup pineqartumut nalunaarutigineqarneraniit kingusinnerpaamik sapaatit akunnerisa arfineq pingasut qaangiunnerini eqqartuussivinnut ingerlateqqinneqarsinnaapput.

Kapitali 6

Pilersuisussaatitaaneq Pilersuisussaatitaasussamik pilersuutissatullu pisussaaffinnik toqqaaneq

§ 23. Naalakkersuisut pilersuisussaatitaanerup iluani kiffartuussissutinik ammanerulersinneqartunik sullissisussamik ataatsimik amerlanerusunilluunniit toqqaasinnaapput sukumiinerusunillu maleruagassiorsinnaallutik:

- 1) Nalunaarasuartaateqarnermik kiffartuussinerni arlaat pilersuisussaatitaaffussanersoq.
- 2) Pilersuisussaatitaanermi nalunaarasuartaateqarnermik sullissinerit qanoq annertussuseqassanersut, taassuma ataani atortulersuutit sullississutillu suut tamatumunnga attuumassuteqassanersut.
- 3) Pilersuinissamut pisussaatitaaffik qanoq annertussuseqassanersoq, tak. imm. 2.

Imm. 2. Pilersuisussaatitaanermi pineqarpoq pilersuisussaatitaanerup iluani kiffartuussissutinik sullissisussamik, kikkunnulluunniit tamanna pillugu qinnuteqartunut pilersuisussaatitaanermi sullississutinik pilersuisussamik tuniniagaqartussamilluunniit toqqaanissamut pisussaatitaaffik, tamannalu aamma imm. 3 tunngavigalugu maleruagassiat piumasaqaatillu naapertorlugit pissaaq.

Imm. 3. Naalakkersuisut nalunaarasuartaateqarnermi kiffartuussissutinik pilersuisussaatitaaffiusunik akinik aalajangersaasarnermut maleruagassanik aalajangersaasinnaapput.

Pilersuisussaatitaanermi amigartoorutininut aningaasaliisarneq

§ 24. § 23, imm. 1 naapertorlugu pilersuisussaatitaanerup iluani kiffartuussissutinik sullissisussatut toqqarneqartoq pisinnaatitaavoq amigartoorutit, suliassaqarfimmi ammanerulersinneqartumi pilersuisussaatitaaneramik suliakkerneqarnerup kingunerisaanik pilersimasinnaasut uppersarsarneqartut tamaasa matussusertissallugit.

Imm. 2. Naalakkersuisut pilersuisussaatitaanerup iluani kiffartuussissutinik sullissisup naatsorsuutaasa ilusissaannut, amigartoorutininut naatsorsueriaasissamik uppersarsaasioriaasissamillu piumasaqaatit pillugit maleruagassanik sukumiinerusunik aalajangersaasinnaapput, tak. imm. 1.

Imm. 3. Nalunaarasuartaateqarnermi Aqutsisut pilersuisussaatitaanerup iluani kiffartuussissutinik sullissisoq imm. 1-imi taaneqartutut amigartoorutininut matussusiiffigineqarnissaminut naammattunik uppersarsaasiisimanersoq aalajangissavaat.

Imm. 4. Nalunaarasuartaateqarnermi Aqutsisut imm. 3 naapertorlugu uppersarsaammik akuersinerat kiffartuussissummik pilersuisussaatitaanermi amigartoorutit matussusertinneqarnissaannik pisinnaatitsissaaq, tak. imm. 1.

Imm. 5. Naalakkersuisut amigartoorutininut matussusiisarnernup imm. 1-imi taaneqartup naatsorsorneqarnissaannut maleruagassanik sukumiinerusunik aalajangersaassapput.

Pilersuisussaatitaanerup iluani tuniniagaqartunut piumasaqaatit

§ 25. Naalakkersuisut pilersuisussaataitaanerup iluani kiffartuussissutininik tuniniagaqarnermut pilersuinerimullu atatillugu atuisut pisinnaatitaaffinut tunngaviusussanik qulakkeerinissaq eqqarsaatigalugu, pilersuisussaataitaanerup iluani kiffartuussissutininik sullissisussatut toqqarneqartup pisussaaffii pillugit maleruagassanik aalajangersaasinnaapput.

Imm. 2. Maleruagassat imm. 1 naapertorlugu aalajangersarneqartut piumasaqaatit nalinginnaasut, pilersuisussaataitaanerup iluani kiffartuussissutininik sullissisup atuisullu akornanni atuuttussat imaannut aalajangersakkanik immikkut piumasaqaateqarfiusunik imaqarsinnaapput, taamaattorli tak. § 28.

Imm. 3. Naalakkersuisut isumaqatigiissutini piumasaqaatit imm. 2-mi taaneqartut Nalunaarasuartaateqarnermi Aqutsisunit akuerineqartarnissaannut maleruagassiorsinnaapput.

Kapitali 7

Nalunaarasuartaateqarnermi Aqutsisut, Nalunaarasuartaateqarnermi Maalaaruteqartarfik pilersuisussaataitanermilu amigartoorutit aningaasalersorneqarnissaat

§ 26. Nalunaarasuartaateqarnermik suliaqartut Nalunaarasuartaateqarnermi Aqutsisut, Nalunaarasuartaateqarnermi Maalaaruteqartarfik pilersuisussaataitanermilu amigartoorutaasinnaasut aningaasalersussavaat.

Imm. 2. Taakkununga aningaasalersuutissatut ungasianiit attaveqaqatigiinnermik atuinermut immikkut akiliummik akiliisitsisoqartassaaq, taannalu akuersisummik pigisaqartup Nalunaarasuartaateqarnermi Aqutsisunut akilertassavaa.

Imm. 3. Akiliut imm. 1 naapertorlugu Inatsisartut Aningaasaqarnermut Inatsisaatigut aalajangersarneqartassaaq. Ungasissumit attaveqaqatigiinnermut akiliut amerlasuukkaaraluni tuniniaavimmut atatillugu akilersinneqartassaaq.

Kapitali 8

Atuisunik illersuineq

Nalunaarasuartaatitigut atassuteqarnermi atortulersuutininik nalunaarasuartaateqarnermilu kiffartuussissutininik piginnittunut tuniniagaqartunullu piumasaqaatit minnerpaaffiat

§ 27. Naalakkersuisut Naalakkersuisut atuisut kalerrisaarivimmut tamanut ammasumut aamma normunik paasiniaavinnut atassuteqarsinnaanissaat qulakkeerniarlugu nalunaarasuartaatitigut atassuteqarnermi atortulersuutininik piginnittut aamma nalunaarasuartaatitigut atassuteqarnermi atortulersuutininik nalunaarasuartaateqarnermilu kiffartuussissutininik tuniniagaqartut pisussaaffilerneqarnissaat eqqarsaatigalugu maleruagassanik aalajangersaasinnaapput, tamatuma ataani pisussaaffliinerup tamatuma imassaanut sukumiinerusunik maleruagassiorneq.

Kingulliullutik atuisut pisinnaatitaaffii tunngaviusut

§ 28. Naalakkersuisut nalunaarasuartaatitigut kiffartuussissutininik tuniniagaqartut atuisunut sullissisuusut pilersuinissamut isumaqatigiissuteqarnermut atatillugu atuisut pisinnaatitaaffinut tunngavissanik arlalinnik qulakkeerinissaq anguniarlugu nalunaarasuartaatitigut kiffartuussissutininik

tuniniagaqartut atuisunut sullissit pisussaaffilerneqarnissaat eqqarsaatigalugu maleruagassanik aalajangersaasinnaapput.

Imm. 2. Imm. 1 naapertorlugu maleruagassat ilaatigut aalajangersakkanik imaattunik imaqarsinnaapput

1) Tunngaviummik sullitanut attaveqarnermi qanorluunniit ittumi allakkatigut isumaqatigiissuteqarsimanissaq, isumaqatigiissusiassap ilusissaanut piumasaqaatit minnerpaaffilerneqarnerat, sullissit paasissutissiisussaaitaanera, kiisalu isumaqatigiissutit imassaanut isumaqatigiissummilu piumasaqaatigineqartussanut piumasaqaatit minnerpaaffissaat, matumani ilaallutik isumaqatigiissummi piumasaqaatit imassaanni piffissap pituttorsimaffiusussap, akinik piumasaqaatinillu allannguinnermi siumut ilisimatitsinissap, qularnaveeqqusiinissap, taamaatitsinissap aammalu ilaatigut atuisut tungaaniit sumiginnaasoqarneranut atatillugu attaveersinerup sivilunerpaaffissaanut piumasaqaatit minnerpaaffissaat.

2) Terminalinut atortunut teknikkikkullu atortulersuutunik immikkut ittunik atugassiisutunik atassusiinnermut atuinermullu piumasaqaatit minnerpaaffissaat.

3) Atugassanik atortunillu immikkut ittunik atuisunut atugassiinissamut pisussaaffeqarnek, matumani ilaalluni atugassat atortullu taakku atuisunut akeqanngitsumik atugassiinnaanermut, aammalu atugassat atortullu pineqartut pillugit atuisunut ilisimatitsinissamut pisussaaffeqarnek.

4) Immikkut ittumik atuisuusut, tamatumani ilaallutik innarluutillit, pisariaqartitaannik naammassinninnissaq.

Imm. 3. Imm. 1 aamma 2 naapertorlugit maleruagassiornermi aalajangerneqarsinnaavoq pineqartut taamaallaat isumaqatigiissutitut aalajangersimasunut atuutissasut, matumani ilaallutik atuisunut inuussutissarsiutit ingerlataqanngitsunut isumaqatigiissutit, aammalu maleruagassat isumaqatigiissutigineqareernerminni sanioqqunneqarsinnaassanngitsut.

§ 29. Naalakkersuisut nalunaarasuartaatitigut kiffartuussisutitut atuisunut tuniniagaqartut tuniniaanerminnut atatillugu atuisut ammasumik assigiimmillu periarfissaqarfiusumik nalunaarasuartaatitigut kiffartuussivinnik tuniniagaasunik atuinissamut periarfissinneqarnissaat qulakkeerniarlugu maleruagassanik aalajangersaasinnaapput.

§ 30. Naalakkersuisut oqarasuaatinik akiliilluni atorineqartartunik, tuniniagaqartunut oqarasuaatinik akiliilluni atorineqartartunik pilersitsinissamut ingerlatsinissamullu piumasaqaatit annikinnerpaaffissaannik imaqtartunik maleruagassiorsinnaapput.

Nalunaarasuartaatitigut attaveqatigiinnermik isertuussineq

§ 31. Nalunaarasuartaatitigut attaveqatigiinnermut atortunik piginnittut, nalunaarasuartaatitigut attaveqarnermut atortunik imaluunniit nalunaarasuartaatitigut kiffartuussinnermik tuniniagaqartut kiffartuussisummik allat atuinerat pillugu paasissutissat taakkuluunniit imaasa susasaqanngitsunit pissarsiarineqarsinnaannginnissaat qulakkeerniarlugu iliuuseqassapput.

Imm. 2. Nalunaarasuartaatitigut attaveqatigiinnermut atortunik imaluunniit nalunaarasuartaatitigut kiffartuussinnermik piginnittut tuniniagaqartullu, inuunnaat imaluunniit suliffeqarfiit aningaasaqarnikkut inissisimanerannut paasissutissat, suliassaminnik isumagisaqarnerminni ilisimalikkatik eqqarsaatigalugit susasaqanngitsunut pinngitsooratik nipangiussisussaaitaanertik ataqqissavaat.

Imm. 3. Taamatut pisussaaffiliineq aammattaaq maanna sulisuusunut siornatigullu sulisorineqarsimasunut, piginnittumut imaluunniit tuniniagaqartumut sullissinerminni pissutsinik taamaattunik ilisimalersimasaqalersimasunut atuuppoq.

Imm. 4. Pisussaaffiliineq aama atuutissaaq ikiortaallutik sulisunut immikkut ilisimasalinnut aammalu kikkunnulluunniit tamanut piginnittumik neqerooruteqartumilluunniit isumaqatiginnillutik sulilersimasumut taannalu aqqutigalugu pissutsinik taamaattunik ilisimasaqalersimasunut. Tamanna suliffeqarfimmut isumaqatigiissutaasimappat, taamatut pisussaaffiliineq sulisunut suliffimmi sulinerminni pissutsinik siuliani taaneqartunik ilisimasaqalersunut tamanut atuuppoq.

Inuit pillugit paasissutissanik suliaqarneq normunillu isertortunik ingerlatitseqqittarneq

§ 32. Naalakkersuisut nalunaarasuartaatitigut kiffartuussinermik tuniniagaqartut nalunaarasuartaatitigut atassuteqarnermut atatillugu inuit pillugit paasissutissanik oqarasuaatillu normuinik isertortunik suliaqarnerannut maleruagassanik aalajangersaasinnaapput.

Kapitali 9

Nalunaarasuartaatitigut attaveqarneq inuiaqatigiinnut pingaarutilik

§ 33. Naalakkersuisut nalunaarasuartaatitigut attaveqarnermi atortulersuutinik sullissisut aamma nalunaarasuartaatitigut kiffartuussissutinik sullissisut inuiaqatigiinni nalunaarasuartaatitigut attaveqarneq pingaarutilik qulakkeerniarlugu pilersaarusiortarnissaat iliuuseqartarnissaallu pillugu maleruagassanik aalajangersaasinnaapput.

Imm. 2. Nalunaarasuartaatitigut attaveqaatit upalungaarsimanerni pisunilu allani immikkut ittuni attaveqaqatigiinnermut tunngavissisut, matumani ilaallutik immikkut atortussiat, Namminersorlutik Oqartussanut aningaasartuutaanngitsumik atortunik immikkut ittunik pilersuinissamut pisussaaffeqassaaq.

Imm. 3. Naalakkersuisut maleruagassanik imm. 1-imi taaneqartut assinginik, pisortani oqartussaasunut kiisalu pisortat namminersortullu suliffeqarfiutaannut sullissiviutaannullu atuutsinneqartussanik aalajangersaasinnaapput.

Kapitali 10

Pineqaatissiisinnanermut aalajangersakkat

§ 34. § 1, imm. 1-ip aamma § 7-ip unioqqutinneqarneri Kalaallit Nunaanni pinerluttulerinermut inatsimmi maleruagassat naapertorlugit akiliisussanngortitsinermik kinguneqarsinnaavoq.

Imm. 2. § 31-p unioqqutinneqarnera Kalaallit Nunaanni pinerluttulerinermut inatsimmi maleruagassat naapertorlugit akiliisussanngortitsinermik pinerluuteqarsimasunilluunniit inissiisarfimmiittussanngortitsinermik kinguneqarsinnaavoq.

Imm. 3. § 8, imm. 1, § 12 aamma § 23, imm. 2 naapertorlugit peqqussuteqarnerup malinneqannginnerini Kalaallit Nunaanni pinerluttulerinermut inatsimmi maleruagassat naapertorlugit akiliisussanngortitsisoqarnissaa aalajangerneqarsinnaavoq.

Imm. 4. § 3, § 23, § 25, § 27 aamma § 29 naapertorlugit peqqussuteqarnerni Kalaallit Nunaanni pinerluttulerinermut inatsimmi maleruagassat naapertorlugit akiliisussanngortitsisoqarnissaa aalajangerneqarsinnaavoq.

Imm. 5. Inatsisartut inatsisaanni imaluunniit Inatsisartut inatsisaat naapertorlugu peqqussutini akiligassanngortitsinissap aalajangerneqarnissaa inatsisitigut tunngavissinneqarpat, Kalaallit Nunaanni pinerluttulerinermut inatsimmi maleruagassat naapertorlugit suliffeqarfinnut akiliisussanngortitsisoqarsinnaavoq.

Imm. 6. Imm. 1-5 naapertorlugit suliat Kalaallit Nunaata Eqqartuussivianut siullertut suliaakiiisutiginartassapput.

Imm. 7. Imm. 1-5 naapertorlugit akiligassiinerit Nunatta karsianut nakkartinneqassapput.

§ 35. Inatsisartut inatsisaanni matumani imaluunniit taanna naapertorlugu peqqussutini aalajangersakkanik unioqqutitsinerni Pinerluttulerineq pillugu inatsimmi arsaarinninnermut malittarisassat taamatuttaaq atuutissapput.

Imm. 2. Imm. 1 naapertorlugu arsaarinnissutit Nunatta karsianut nakkartinneqassapput.

Kapitali 11

Atulorfissaanut aalajangersakkat il.il.

§ 36. Inatsisartut inatsisaat manna atuutilerpoq ulloq 31. januar 2018-imi.

Imm. 2. Tamatumunga peqatigitillugu nalunaarasuartaatitigut attaveqarneq sullissinerillu pillugit Inatsisartut peqqussutaat nr. 17 20. novembari 2006-imeersoq atorunnaarsinneqarpoq.

Imm. 3. Allaffissornikkut peqqussutit, Inatsisartut peqqussutaanni taaneqartumi imm. 2 naapertorlugu atulersinneqartut imaluunniit atuutsiinnarneqartut Inatsisartut Inatsisaat manna naapertorlugu taarserneqarnissamik atorunnaarsinneqarnissamilluunniit tungaanut atuutiinnassapput.

§ 37. Danskit - amerikamiut illersornissamut suliassa qarfinut Inatsisartut peqqussutaat nr. 10, 28. oktober 1993-imeersoq, danskit - amerikamiut illersornissamut suliassa qarfiini nalunaarasuartaatitigut attaveqatigiinneq aamma nalunaarasuartaatitigut sullissinerit pillugit Namminersornerullutik Oqartussat nalunaarutaatigut nr. 31-ikkut, 10. august 2001-imeersukkut, isumaqatigiissut 27. april 1951-imeersoq naapertorlugu atuutsinneqalersoq tunngavigalugu atuutsinneqalersoq atuutiinnassaaq, imm. 2 naapertorlugu Inatsisartut peqqussutaata matuma atuutilernissaata tungaanut.

Imm. 2. Inatsisartut peqqussutaat manna Kalaallit Nunaannut inatsimmi nr. 1089-imi, 29. december 1997-imeersumi § 3 naapertorlugu aamma ilinniartitaanermut Ilisimatusarnermullu Ministerip isumaqatigiissuteqarfigineratigut danskit amerikamiullu ataatsimut illersornissamut suli qarfinut, Kalaallit Nunaanni illersornissaq pillugu aalajangersagaq 27. august 1951-imeersoq naapertorlugu pilersinneqarsimasunut atuutsinneqalersinnaavoq.

Inatsisartut inatsisissaata nr. 58-ip, 25. november 2024-meersup (Nunap immikkoortuini akitigut naligiissaarisoqarnissaanut aamma ajunaalernerni isumannaallisaanikkullu sullissiffusut

annertusineqarnissaannut akuersisummik pigisaqartumut peqqusinissamut tunngavissaq)^[1]
atuutilerfissanut aalajangersakkat imatut imaqarput:

§ 2

Inatsisartut inatsisaat 1. januar 2025-mi atuutilissaaq.

Ineqarnermut Attaveqaasersuutinullu Naalakkersuisoqarfik, ulloq 10. februar 2025

Ruth Lindhardt (atsior.)
Naalakkersuisoqarfimmi pisortaaneq

/ Kenneth Lund Bøjler (atsior.)

^[1] Inatsimmut allannguutit § 1, imm. 2, nr. 2-mut aamma § 5a-mut tunngasuupput.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

